



ССР Иттифоқи Президенти Фармони

ИҚТИСОДИЙ БУЗҒУНЧИЛИККА ВА ИҚТИСОДИЁТ СОҲАСИДАГИ БОШҚА ЖИНОЯТЛАРГА ҚАРШИ КУРАШНИ ТАЪМИНЛАШ ЧОРАЛАРИ ТЎҒРИСИДА

Иқтисодий бузғунчиликка, иқтисодиёт соҳасидаги бошқа жиноятларга қарши курашни таъминлаш ҳамда аҳолини озиқ-овқат маҳсулотлари ва бошқа халқ истеъмол моллари билан таъминлашни тартибга солиш мақсадида, СССР Конституциясининг 127 (5) моддасига ва «Мамлакат иқтисодий ва ижтимоий-сиёсий турмушини барқарорлаштиришга доир қўшимча чоралар тўғрисида»ги СССР қонунининг 1-моддасига асосан совет милицияси, СССР давлат хавфсизлиги идоралари ҳамда оператив-қидирув фаолияти тўғрисида қонунлар қабул қилингунга қадар қарор қиламан:

1. Белгилаб қўйилсинки, ички ишлар ва давлат хавфсизлиги идоралари ССР Иттифоқи ва иттифоқдош республикалар жинойи суд юритиш асосларининг 29-моддасига мувофиқ иқтисодиёт соҳасида жиноят белгиларини ҳамда уларни содир этган шахсларни аниқлашга доир оператив-қидирув тадбирларини амалга ошириш чоғида қуйидаги ҳуқуқларга эгадирлар:

1. Корхоналар, муассасалар ва ташкилотларнинг (хорижий дипломатия ваколатхоналаридан ташқари) биноларига, фуқаролар якка тартибдаги ва бошқа меҳнат фаолияти билан ҳамда тадбиркорликнинг бошқа турлари билан шуғулланиш учун фойдаланаётган ишлаб чи-

қариш биноларига ҳеч қандай тўсқинликсиз кириб, мулк эгаси ёки унинг вакили ёхуд у ваколат берган шахс билан биргаликда ишлаб чиқариш, омор, савдо ва ёрдамчи биноларни, транспорт воситаларини, мол-мулк сақланадиган ва фойдаланадиган бошқа жойларни кўздан кечириш. Мулк эгаси ёки унинг вакили текшириш ўтказишда, намуналарни олишда иштирок этишдан бош тортган тақдирда бу ишлар уларнинг иштирокисиз, жамоат ташкилотларининг, халқ депутатлари маҳаллий Советлари ижроия комитетларининг вакиллари ни жалб этиб амалга оширилиши мумкин.

2. Корхоналар, муассасалар, ташкилотлар қайси идорага бўйсунганидан, мулкчиликнинг қандай шаклига

асосланганидан қатъи назар уларнинг, шу жумладан совет ва хорижий ҳуқуқий шахслари ва фуқаролари иштирокидаги қўшма корхоналар, бирлашмалар ва ташкилотларнинг раҳбарларидан, мансабдор шахсларидан ва бошқа ходимларидан, шунингдек якка тартибдаги ва ўзга меҳнат фаолияти билан ҳамда тадбиркорликнинг бошқа турлари билан шуғулланувчи шахслардан текширилаётган фаолиятга тааллуқли бўлган зарур маълумотлар, ҳужжатлар ва ёзма изоҳномаларни олиш.

3. Мавжуд давлат, кооператив, жамоат мулкни корхоналар, муассасалар, ташкилотларнинг ҳисоб ва ҳисобот маълумотлари билан солиштириш; халқ истеъмол моллари, озиқ-овқат маҳсулотлари ишлаб чиқариш

сақлаш, ташиш ва сотиш чоғида, шунингдек аҳолига хизмат қилиш чоғида истеъмолчининг ҳуқуқларини ҳимоя қилишни таъминлайдиган нормалар ва қондаларга риоя этилишини текшириш; тахлил этиш ва сифатини текшириш учун хом ашё, ярим тайёр ва тайёр маҳсулотларнинг намунасини олиш.

4. Корхоналар, муассасалар, ташкилотлар, улар мулкчиликнинг қандай шаклига асосланганлигидан қатъи назар амалга оширадиган кредит-пул операциялари ва ташқи иқтисодий битимлари тўғрисидаги оператив маълумотларни ва ҳисобот маълумотларини банклардан, бошқа молия-кредит муассасаларидан олиш.

5. Кассаларни, пул, моддий бойликлар ва ҳужжат-

лар сақланадиган бошқа жойларни муҳрлаб қўйиш, шунингдек зарур ҳолларда мазкур буюмларнинг сақланишини таъминлайдиган ўзга чораларни кўриш.

6. Корхоналар, муассасалар, ташкилотлар раҳбарларини, мансабдор шахсларини, бошқа ходимларини, якка тартибдаги ва ўзга меҳнат фаолияти билан ҳамда тадбиркорликнинг бошқа турлари билан шуғулланувчи шахсларни қонун бузилишига йўл қўйиб бўлмаслиги ҳақида расмий равишда огоҳлантириш ва бу ҳақда прокурорга хабар бериш.

7. Ўтказилаётган тадбирларда қатнашиш учун қонунда белгилаб қўйилган тартибда мутахассисларни таклиф этиш.

8. Текшириш ўтказиётган шахс текшириш, намуналарни олиш, муҳрлаш тўғрисида акт тузади, актининг бир нусхасини тилхат билан мулк эгасига ёки унинг вакилига топширади.

9. Ички ишлар ва давлат хавфсизлиги идораларининг ходимлари бу тадбирларни амалга ошириш чоғида олинган маълумотларини ошкор этишни истисно қиладиган қоидаларга риоя этилишини таъминлашга мажбурдирлар.

Совет Социалистик Республикалари Иттифоқининг Президенти
М. ГОРБАЧЕВ.
Москва, Кремль.
1991 йил 26 январь.

2-БЕТГА ҚАРАНГ!

Ўзноманинг 2-бетида халқ хўжалигимиз барқарорлигига раҳна солаётган хуфёна иқтисод ҳақидаги мақола билан танишишингиз мумкин.

БУЛДИ АЖАБ ҲАНГОМАЛАР

КЎЗГА ТЎТИЁ ЭДИ

Йирик пулларни муомаладан бирданига чиқариб ташлашни баъзи бели бақувватларни оёғи куйган товуқдек зир югуртириб қўйди.
● 24 январь кuni Қорақалпоғистон жумҳурияти Қўғирот шаҳридаги омонат банкнинг кассасида 1365 сўмлик камомад аниқланди. Ҳисобини йўқотган банк бошқарувчиси ва кассирга нисбатан ЎзССЖ жиноят мажмуасининг 117,149-моддалари асосида жинойиш иш кўзгатилади.

● Темир йўлнинг Қўқон бекатидаги ички ишлар бўлими БХСС бўлинимаси ходимлари диққатини 1-ишчилар таъминоти бўлимига қарашли дўконга кирган ғалати харидор тортди. У уч минг сўмлик саноат молларини харид қилиб, сотувчилар қўлига сариқ чақага ҳам арзимайдиган 50 ва 100 сўмлик пулларни тутқазишга уринди. Икки кун бурун кўзга тўтиёдек суриладиган пулларни харжлашга андакки-на кечиккан уддабурон дўкондан қўлини бурнига тиқиб чиқди.

Ғ. ЖУРАЕВ.



Патруль-пост хизмати ходимлари кунни иш тақсими-тидан бошлайдилар. Бу фақатгина тартиб талаби бўлиб қолмай, ходимларни жойлардаги вазият билан таништирувчи тадбир ҳамдир. Ўғирланган машиналар, қидирилаётган шахслар ҳақида маълумот олинади. Кейин милиция ходимлари топшириқни адо этиш учун белгиланган жойларга жўнаб кетадилар.

Ана шундай экипажлардан бирига мен ҳам қўшилдим. Ҳамроҳларим Киров тумани ИИБ жамоат тартибини сақлаш бўлинимаси бошлиғи милиция капитани Зиёвуддин Пўлатов ва патруль-пост хизмати 5-рота взводи командири вазифасини бажарувчи милиция катта сержанти Фозил Жабборовлар эди.

Биз туманининг энг серташвиш жойларидан саналган «Зарафшон» ресторани томон кетмоқдамиз. Соат миллари 16 дан 20 дақиқа ўтганини кўрсатади. Ҳозирча ресторан атрофида бирмунча хотиржамлик, асосий қийинчилик тунда бошлана-

ди. Чунки бу сершовқин масканга ташриф буюрувчилар орасида ҳар хил кишилар бор.

Патруль-пост хизмати ходимларининг асосий вазифаси жамоат жойларида ҳар қандай қонунбузарликнинг пайини қирқидан иборат. Бундай қонунбузарлар эса «Зарафшон» ресторани, «Тошкент» меҳмонхонаси, «Искра» кинотеатри, Инқилоб хиёбони атрофларида кўплаб учратилади. Шунинг учун ҳам бу хизмат милиционерлари мана шу жойларни назоратдан қочирмайди.

— Биз улар билан доимо алоқада бўламиз, — дейди участка вакили, милиция катта лейтенанти Темур Иминов. — Чунки уларсиз бизнинг ишимизни тасаввур қилиш қийин.

«Зарафшон» теварагида бир оз айланиб юриб билдикки, чиндан ҳам бу ер қондубузарликнинг маркази экан. Тўсатдан ҳамроҳим милиция сержанти Фозил Жабборов

метронинг бекатига қараб кетаётган йигитга ишора қилди:

— Анови нухсага эътибор беринг, сигарета олиб кетяпти!

Буни сезган йигит қоча бошлади. Ҳайдовчимиз эса машинанинг махсус чироқларини ёқиб, қочқини қувиб етди. Чиндан ҳам 1974 йилда туғилган Баҳодир Султоновнинг сумкасида Болгарияда тайёрланган 60 қути сигарета чиқди. Бу сигаретанинг бир қутиси 50 тийин туради, лекин чайқов баҳоси қанчалигини кашандалар билишади.

Александр КОШКИН.

Суратларда: 1. Командир вазифасини бажарувчи милиция катта сержанти Жаббаров навбатдаги вазифалар ҳақида взвод милиционерларига тушунтириш бермоқда.

2. Катта участка инспектори Темур Иминов алоқада.



3. Сигарета билан қўлга тушган Б. Султонов ички ишлар бўлимига келтирилди.

Суратларни муаллиф олган.



Ф НАИСИ БАЛО

АЖДАХО

Кейинги йилларда «хуфёна иқтисод», «чайнов бозори», «уюшган жиноятчилик» деган ибораларни матбуот саҳифаларида мунтазам учратадиган бўлиб қолдик.

Хўш, бу нима ўзи? Бир сўз билан айтганда, «кўзга кўринмас» иқтисоднинг яширин қирралари шулар. Халқ хўжалигида юз бериб келадиган инқироз бу ҳолнинг тораба такомиллашишига йўл очиб берапти.

Агар бу муаммага чуқурроқ назар ташлайдиган бўлсак, мазкур «касаллик» олтмишинчи йилларда «туғилганини» кўрамиз. Шунча даврдан бери уни таҳлил этишда муҳим жиҳатларга эътибор берилмади. Маҳаллий матбуот эса валютачилар ва яширин цех очган милиционерлар ҳақида шов-шув кўтаришдан нарига ўтмади.

Аслида бу оламшумул муаммо. Шу боис бир қанча мамлакатларда уни атрофича ўрганиш кун тартибидан энг муҳим масала ҳисобланади. Жумладан Франция, Англия, Португалия, Голландияда махсус ишчи гуруҳла-

ри тузилган. Австриядаги ана шундай гуруҳ эса 1984 йилдан бери фаолият кўрсатиб келяпти. АҚШ конгресси эса океан ортидаги хуфёна иқтисодни ипидан игнасигача ўрганишга бел болаган ташкилот ва мутахассисларни маблағ билан тўлатукин таъминлашга жиддий аҳамият берапти.

Энди бевосита хуфёна иқтисод ҳақида фикр юритадиган бўлсак, у чун муҳим қисмга бўлинади.

Биринчиси — норасмий иқтисод: бунга руҳсат берилган иқтисодий фаолиятнинг расмий статистика томонидан ҳисобга олинмайдиган доираларида учрайдиган моллар ишлаб чиқариш ва хизмат кўрсатиш турлари, бу фаолиятни солиқ солишдан яшириш ҳоллари кирди.

Иккинчиси — қалбаки иқтисод: бу пул олиш ва пул бериш билан боғлиқ бўлган қўшиб ёзиш, талон-тарожчилик, чайновчилик, порахўрлик, фирибгарлик иллатлари демандир.

Ва ниҳоят учинчиси — маҳфий иқтисод: бунда иқтисо-

дий фаолиятнинг қонун билан таъқиқланган турларини тушуниш керак. Айнан шу доирада уюшган иқтисодий жиноятчилик мавжудлиги кўзга ташланади.

Аҳоли пул даромадининг ортиб бориши хуфёна иқтисоднинг «ҳаёт кечирishi» учун шарт-шароит яратиб берувчи асосий омиллардан биридир. Мисол учун 1971 йилдан 1989 йилгача аҳоли пул даромади уч ярим-тўрт баравар ўсди. Бу эса истеъмол бозорида эҳтиёж ва талаб орасидаги мувозанат бузилиб кетди, деган сўз.

Шу ўринда қуйидагини ҳам таъкидлаб ўтишимиз шарт: ўн иккинчи беш йилликнинг дастлабки уч йилида чакана савдодаги запас моллар миқдори 0,25 бараварга қисқарди. Барча турдаги товар гуруҳларини тайёрлаш режага нисбатан 75—80 фоизда қолиб кетди.

Агар 1988 йилда 8 кунга етадиган товар запаслари бўлган бўлса, 1990 йилга келиб мамлакатимиздаги қўпгина йирик шаҳарларда 2—3 кунга етадиган товар за-

пасига эга бўлинди, холос. Яна шунинг эътиборига олиш керакки, бундай аҳвол мамлакатимиз иқтисодиётида олтмишинчи йиллардан бери умуман бўлмаган эди.

Ички истеъмол бозоридаги номуаносиблик қиймати 1990 йил бошида 165 миллиард сўмни ташкил этди. Бу, ўз-ўзидан равшанки, хуфёна иқтисоднинг шиддат билан ўсишига туртки бўлди. Айнан шу ўн иккинчи беш йиллик мобайнида валюта билан боғлиқ ишлар, чайновчилик, яширин равишда турли маҳсулотлар ишлаб чиқариш ҳамда хизмат кўрсатиш доирасидаги қинғирликлар кучайгандан-кучайди. Яна ҳам бошқачароқ айтганда, хуфёна иқтисод истеъмол бозоридаги тақчилликни юзага чиқарди. Шу сабаб бўлиб пул қадрсизлана бошлади. Аҳвол шундай бўлгач, ойлик маош қадрсизланиши ҳам турган гап. Бу эса табиий равишда фуқароларда қўшимча равишда даромад топиш истагини кучайтиради. Натижада ҳар бир оила турмуш фаровонлигини пул қадрсизланиши туфайли туғиладиган хавфдан муҳофаза этиш истаги хуфёна иқтисодни кучайтирувчи иккинчи асосий омил бўлиб хизмат қилади.

Етмишинчи ва айниқса саксонинчи йилларда уюшган иқтисодий жиноятчилик ҳаддан ташқари авж олиб кетди. Алоҳида яширин цехлар, устахоналар эндиликда ягона «тармоққа» бирлаша бошлади. Уларни яширин менежерлар бошқаруви йўлга қўйилди. Ҳатто ҳукуматнинг юқори идораларида ўтирган казо-казолар ҳам бу ўйиндан четга қолишмади.

ССЖИ ички ишлар вазирлигига қарашли бутуниттифоқ илмий-текшириш институти маълумотларига қараганда, 508 та жиноий ва 208 та ўта жиноий гуруҳлар мамлакатнинг 32 та минтақаси бўйлаб иш олиб борапти.

Ҳар бири камида 50 кишидан ташкил топган бу гуруҳлар 100 миллион сўм атрофида «фойда келтирадиган» турли жиноий ишларни амалга оширмоқда. Агар улар фаолиятини сарҳисоб қиладиган бўлсак, кейинги

йигирма йил давомида уюшган ҳолда қилинган талон-тарожчилик олти бараварга ошганлигини, келтирилган моддий зарар эса ўн икки бараварга кўпайганлигини кўзатамиз.

Хўш, хуфёна иқтисоддан халқ хўжалигининг қайси тармоқлари жиддий зарар кўраяпти? Бу саволга ҳам лўндагина жавоб қилишимиз мумкин: биринчи навбатда қишлоқ хўжалигимиз бир йил давомида оз эмас-кўп эмас, 23 миллиард сўм зарар кўрар экан. Кейинги «жабрдийда» эса савдо ва умумий овқатланиш қорхоналари. Улар бир йилда 17 миллиард сўм атрофида маблағдан «жудо» бўлади. Қурилиш соҳаси йўқотаётган маблағ ҳам чакана эмас — 11 миллиард сўмни ташкил этади. Ва энг сўнгиси саноат. Бу ерда хуфёна иқтисод 10 миллиард сўмни еб тўймас аждаҳо каби «ютиб юборапти».

Энг ёмони жамиятда иқтисодий жиноятчиликка кўникма секин-асталик билан бўлса-да, такомиллашиб кетаяпти. Унинг баъзи турлари аҳоли маълум гуруҳлари ҳаёт тарзига сингиб борапти. Кейинги йигирма беш йил давомида хуфёна иқтисод қурилишда 60 марта, транспорт ва алоқа соҳасида 40 марта, қишлоқ хўжалиги ва саноатда 30 марта ўсиб кетди. Бу жамиятимиз бойлигини сўриб олаётган аждаҳо тобора кутуриб бораётганлигини кўрсатади.

Энди олдимизда битта савол кўндаланг бўлиб турибди. Хуфёна иқтисодни қандай бартараф этиш мумкин?

Бунинг учун, бизнингча, биринчи галда асосий эътиборни умумий социал характердаги профилактик тадбирларни кучайтиришга қаратмоқ лозим.

Иккинчидан, ҳуқуқ-тартибот органлари — суд, прокуратура, ички ишлар идоралари фаолиятини сифат жиҳатдан юқори поғонага кўтариш даркор.

Энг муҳими — иқтисодиётда демократияни янада ривожлантириш ҳисобига аҳоли фаолигини оширмоқ керак.

Ш. ҚОБИЛОВ,
иқтисодчи.

ЭЗГУЛИКНИНГ КЕЧИ ЙЎҚ

Афғонистон жумҳуриятида байналмилал бурчини бажариб қайтган йигитларнинг 120 нафардан зиёдроғи ҳозир Бухоро вилояти ички ишлар бошқармасида хизматни давом эттиришмоқда. Уларнинг кўпчилиги ватанимиз ҳамда дўст мамлакат орден-медаллари билан тақдирланган. Лекин бу йигитларнинг аксарияти афғон тупроғида кечган йилларни эслашни хоҳлашмайди. Уларнинг ўша пайтларда кўрсатган мислсиз жасоратлари ҳақида ҳужжатлар ҳикоя қилади.

...Рустам Ражабов мақсадсиз уруш йўлларида 15 марта жанговор операцияларда иштирок этди.

1986 йилнинг ноябрь ойида «қоқон»га тушиб қолган афғон разведкачилари радия орқали шовилни ёрдам сўрашди. Ҳар дақиқа ганиматлигини ҳис этган Рустам Ражабов бронетранспортёрига ўтириб, Ҳоки Жаббор туманига шовилди. Унинг ўз вақтидаги ёрдами туфайли афғон разведкачилари омон қолишди.

Рустам Ражабов аини кунларда жамоат тартибини сақлаш бўлимида хизмат қилмоқда. У милиция капитани.

Мухтор Муҳсиновнинг 1987 йил май ойида кўрсатган жасорати янада таҳсинга сазовор. Хонободда бўлган жанглардан бирида у босмачилар катта гуруҳининг бошлигини асирга туширди. Шу туфайли душ-

маннинг кучли отряди тормор келтирилди ва ўқ-дори сақланадиган омбори йўқ қилинди.

Булар байналмилал жангчилар кўрсатган қаҳрамонликлардан айрим лавҳалар, холос. Ҳозир Мухтор Муҳсинов вилоят ИИБда энг намунали хизматчилардан бири ҳисобланади. Кўксига ватанимизнинг «Қизил Байроқ», Афғонистоннинг «Шухрат» ордени ва қатор медаллари бор.

Ўтган йили вилоят ички ишлар идораларида хизмат қилаётган байналмилал жангчилар кенгаши тузилди.

— Ёшларда байналмилал тарбияни кучайтириш — ҳуқуқ-тартибот идораси ҳар бир ходимнинг бурчи бўлиши керак, — дейди кенгаш раиси Мухтор Муҳсинов.

Агар унга қўшимча қиладиган бўлсак, милицияда хизмат қилаётган собиқ байналмилал жангчилар фаоллигини ошириш, ички ишлар ёш ходимларини ватанпарварлик, бурчга садоқат руҳида тарбиялаш, ногиронларга ва уларнинг оилаларига моддий ёрдам кўрсатиш — кенгашнинг асосий вазифаларини ташкил этади.

Байналмилал жангчилар кенгаши ташаббуси билан Қизилтепа туманида шўро ва партия ташкилотлари вакиллари, диндорлар, маҳаллий аҳоли ҳамда ички ишлар бўлими ходимлари иштирокида митинг ўтказилди. Анжуман иштирокчилари афғон тупроғида жанговор

бурчини бажараётиб ҳалок бўлган милиция сержанти Носир Бозоров қабрига гулчамбар қўйишди.

Яна шу нарса аниқландики, марҳум жангчининг оиласи мутлақо эътибордан четда қолиб кетган экан. Ҳатто «Партия XXII съезди» жамоа хўжалигидагилар бу хонадонни электрлаштиришга ҳам ҳафсала қилмаган эканлар. Кенгаш аъзоларининг бевосита аралашуви натижа-сида бу оиланинг яшаш шароити бир мунча яхшиланди, байналмилал жангчилар эса ўзаро келишиб, марҳум ўртоқлари оиласига моддий ёрдам бердилар.

Ёш милиционерларни ички ишлар соҳасидаги ажойиб анъаналар руҳида тарбиялашда Когон ички ишлар бўлими бошлигининг ўринбосари, милиция майори Абдурахмон Қурбонов, вилоят ИИБ котибиятининг бошлиғи, ички хизмат майори Муҳаммад Мусаев, пост-патрул хизмати ротаси командири, милиция капитани Неъмат Жўраев, вилоят ИИБ навбатчи қисм бошлиғи, милиция подполковниги Азамат Рафуров, вилоят ИИБ кадрлар бўлими бошлигининг ёрдамчиси, милиция майори Мўмин Шомуродов ва бошқа байналмилалчи «афғон»лар катта ҳисса қўшмоқдалар.

Е. ЗУЕВ,
Бухоро вилояти ИИБ
матбуот гуруҳининг
катта йўриқчиси.

ДАВЛАТ МУЛКИ САҚЛАБ ҚОЛИНДИ

16 январь кечаси Марғилон шаҳар ички ишлар бўлими қошидаги соқчилик бўлими хизматчилари учун таҳликали кечди.

Номаълум шахслар 82-озик-овқат дўкони эшигига солярка қўйиб, ўт қўйганлар.

Милиция лейтенанти М. Султонов, милиция сержантлари А. Сайдазов, Ф. Исроилов, А. Аҳмедовлар воқеа содир бўлган жойга етиб борганларида, жиноятчилар қочиб қолишган экан.

Милиционерлар «01» га кўнғироқ қилдилар ва фурсатни бой бермай ўрни учирлига киришдилар. Ўт ўчирувчилар келишганда, олов бартараф этилган эди.

Соқчилик бўлими йигитларининг тадбиркорлиги туфайли давлат мулки сақлаб қоллинди.

Ҳозир шаҳар ички ишлар бўлими изкуварлари номаълум жиноятчиларни аниқлаш тадбирларини кўришяпти.

АТИГИ УЧ ДАҚИҚАДА

11 январь куни тонга яқин Фарғона шаҳар ИИБ соқчилик бўлими 2-марказлаштирилган қўриқлаш пункти хизматчилари милиция кичик сержанти А. Солиев ва ҳайдовчи милиция сержанти А. Тўхтабоевлар фуқаро Вагнер уйига қараб

шошилдилар. Улар етиб келгунларича уч дақиқа ўтди.

Хонадон эшигини бузиб, талончилик қилмоқчи бўлган шахс қўлга олинди. У Фарғона шаҳрида иштирокат қилувчи «Восток» фирматининг қоровули Э. Сандмамбетов экан.

ЎҒРИ УШЛАНДИ

ЯНГИ ЙИЛ арафасида «Улибка» дўконига ўрнатилган ташвишгоҳ қурилмаси Янгиер шаҳар ИИБ соқчилик бўлими 2-марказлаштирилган қўриқлаш пункти ходимларини оёққа турғазди.

Милиция катта сержанти И. Бегматов ва милиция кичик сержантлари Н. Анорқулов, Э. Кўчмуродовлар зудлик билан дўконни қуршаб олдилар. Кинолог, милиция катта лейте-

нанти В. Ососков ҳам хизмат ити билан ёрдамга етиб келди.

Орадан кўп ўтмай дўкондан ўғирланган нарсаларни қўлтиқлаб чиққан шахс ушланди. У Қозғистон ҳудудидаги ҳарбий қисмдан қочган 19 ёшли Г. Д. Висксий экан. Суриштирув натижасида ўзи яшаган Ховос посёлкасида келиб, уч марта ўғирлик қилгани аниқланди.

Революция ҲАСАНОВА.

КУРУҚНИ ТЎҒРИЛАР ОТАШ

ЧИНОР қишлоғида дув-дув гап. Нима дейсан, қишлоқнинг уч нафар мана-ман йигитини қамаб қўйишди. Миш-миш деса, ўзини томдан ташлайдиганларга худо берди. Дониёр Болтабоев, Бахтиёр Тулабоев, Хулкор Йўлчиевларнинг ҳибсага олинганлиги асл сабаби биров ўтиб маълум бўлди.

Уч оғайни кунлардан бир кун ўғирлик мазасини тотиб кўришмоқчи бўлишди. Қаерга тушишни ўйлаб ҳўб бош қотирдилар. Жонларига тоғасининг уйини уриш тўғрисидаги Бахтиёрнинг таклифи оро кирди. Ҳеч ким йўқлигида титиб чиқилган Уктам Убаев уйдан танга йиғилган мушукчадан бошқа нарса чиқмади. Сидирилган мушукча ичидаги тангаларни санаб, 15 сўм экан. Учолон беш сўмдан бўлишди.

Киссага пул тушди. Дониёр ва Бахтиёр қишлоқдаги «Гидростроитель» маданият уйида кинофильм кўришга қарор қилишди. Қарашаки, зал томошабинлар билан лиқ тўла. Демак кассага анчагина пул тушган. Фильм намойиши тугагач, эл қатори ташқарига чиққан ошналар Бахтиёр уйида янги режани тузишди.

Тунги соат тўртларга яқин орқа эшикдан киришса, қоровул Воробьева донг қоғи ухляпти. Деворда эса уларнинг келишига тайёрлаб қўйилгандек кассахона калиги осғилки турибди. Икковлон қоровулни каравотдан

ағдариб, боғлаб ташлашди. Хонадаги сейфни олиб, қишлоқнинг пастқам жойида очинди. 433 сўм пул ва 2 дона видеокассета ўртада «ҳалол» баҳам кўрилди.

Яна кинофильм кўриш, шинниҳўрлик қилиш авжига минди, 8 шипа вишо очилгач, ўғирлик ҳумори ҳолижонига қўймаган Бахтиёр бу сафар шерикликка Хулкорни тавлади. Ўғрилар мактаб ошхонасига кириб, ўзлари билан 6 гўла колбасани, кассир ликопчада унутиб қолдирган 10 сўмча чақани олиб кетишди.

Бўстонлиқ туман ИИБ жиноят қидирув ходимлари чакки қадам босган йигитларни фох қилди. Туман халқ суди Дониёр Болтабоевни 4 йилга, Бахтиёр Тулабоевни 3,5 йилга озодликдан маҳрум этди. Хулкор Йўлчиевнинг ёшлиги ҳисобга олиниб, унга чиқарилган ҳукм ижроси 2 йилга кечиктирилди.

Катта ҳаёт остонасида ўз йўлини топишда қийналаётган ёшлар тақдири ҳақида ўйлаб, беихтиёр Саъдий Шерозийнинг қуйидаги сатрларини эслайман:

Кимга ёшлигидан берилмас одоб,
Улғайгач, бўлади бахтсиз,
дил гаш,
Ҳўл новда эгилар, қай хилда эсанг,
Куруқни тўғрилар фақат ўт-оташ.

М. ҲАКИМОВ.



Наманган вилоят Учқўрғон туман ички ишлар бўлими жамоаси ҳуқуқбузарликларнинг олдини олишда кўпчилик кўмағига таяниб иш юритмоқда. Ҳозир тумандаги мавжуд 52 та халқ дружинаси ўз атрофига 7.337 нафар кўнгилли ёрдамчини бирлаштирган. Улар асосий иш пайтидан бўш вақтларда жамоат тартибини сақлаш мақсадида ички ишлар идоралари ходимларига елкадошлик қилишмоқда.

Улар орасида 22 нафар байналмилал жангчилар бор. Тумандаги «Жангчи» ҳарбий-спорт клуби аъзолари ҳуқуқ-тартибот посбонларининг энг яқин кўмакчиларидан ҳисобланишади.

СУРАТЛАРДА: 1. (чапдан ўнга) «Жангчи» ҳарбий-спорт клуби раҳбари Раҳим Саримсоқов, ёғ-мой заводи ишчиси Расул Нишонбоев, ИИБ жамоат тартибини сақлаш инспектори милиция катта лейтенанти Абдулазиз Отамирзаев, участка инспектори милиция лейтенанти Комил Инъомов, ёғиндан сақлаш қисми бошлиғи Шарифжон Раҳматов ва пиво заводи ишчиси Аҳрор Абдубанноевлар навбатчиликка киришишдан олдин кундалик иш режаси ҳақида маслаҳатлашишмоқда.

2. Елкадошлар навбатчиликка йўл олишди. Суратларни Боқижон ХОЛМИРЗАЕВ олган.



«ИШ» УСТИДА ҚЎЛГА ТУШИШДИ

Сирғали тумани ИИБ ҳуқуқбузарлиқнинг олдини олиш катта инспектори, милиция капитани Пўлат Тилипов, милиция катта лейтенанти Даврон Йўлдошевлар кечкурун текшириш чоғида Виталий Ли уйига қадам ранжида қилишди. Ли ва унинг шериги Леонид Ким эшикни қулфлашни ҳам унутиб, бир халта нашани 5—6 мисқолдан қадоқлаб, сотишга мўлжалланган пакетчаларга

жойлаштиришга шўнғиб кетишган экан. Кириб келган милиция ходимларини кўриб, саросимага тушиб қолишди. Тинтувда олинган нашани туман ИИБда ўлчанганда, 5 килограмм эканлиги маълум бўлди. Хавотирга тушган Леонид Кимнинг уйи ҳам зудлик билан текширилганда, 3 килограмм наша топилди.

С. ШОВҚИЕВ.

ОДАМЛАР НЕЧУН ЛОҚАЙД?

— Асабий кўнғироқлар тез-тез бўлиб туради. Биз ҳар вақт ёрдамга шаймиз. Аммо баъзи субутсиз кўнғироқлар ишимизда анча ноқулайликни туғдириб асабимизни бузиб келмоқда, — дейди Тошкент шаҳар Фрунзе ноҳия ИИБ ҳуқуқбузарлик олдини олиш бўлинмаси бошлиғи, милиция майори Маҳкам Содиқов биз билан бўлган суҳбатда.

— Нега? Елғондан кўнғироқ қилганларни қўлга тушириш қийинми?

— Баъзиларини ушлаб жарима ҳам соламан, баъзилари эса кўчадан телефон қилиб қочиб кетишади. Биз айтилган жойга зудлик билан етиб борсак, тинчлик, ҳеч қанақа жиноят содир этилмаган бўлиб чиқади. Айрим пайтда ёзилган шикоят хатларига нима деб жавоб беришининг ҳам билмай қоласан. Кимдир қўшнимнинг ити ҳуриб безовта қилади деса, бошқаси юқори қаватдаги қўшнимнинг боласи кун бўйи югуриб тинчлик бермайди, деб ёзади. Ўзини қон босими касалига чалинганини, шовқун-сурон тўғри келмаслигини айтиб, дўқ-пўписа ҳам қилиб қўйишади. Тасаввур қилинг, бундай ҳолларда милиция нима қила олиши мумкин? Ахир, 2—3 яшар боланинг ўйинқароқ феъли ҳаммага маълум-ку.

— Тушунмасдан ёки атайлаб милицияни безовта қилиб туришлар бўлиши мумкин. Аммо тўғри маънода ёрдам сўраб қилинган кўнғироқларга муносабат қандай? Ахир, бугунги ошқоралик даврида ўғрилар, жиноятчилар фаолияти янада кучайиб, қуппа-қудузи кўнғилларига келган ишни қилмоқдалар.

— Бирорта хабар эътиборсиз қолдирилмайди. Аммо бир нарсага ҳайрон қоламан. Нима учун одамлар ўша ўғри ёки жиноятчини ушлашда бизга ёрдам қўлларини чўзишмайди. 1965 йилдан буён шу соҳада ишлаётган. Мана шу 26 йил мобайнида ҳала бирорта одам жиноят устида ушланган шахсни милицияга етаклаб келганини эслаб олмайман. Аксинча ёрдам бериш ўрнига унинг йўлига гов бўлинганини кўп учратганман. Яқинда 1-пой-афзал фабрикасида ўғирлик содир бўлган. Кечаси соат ўнларда ишчилардан бири беш жуфт ёраклар туфлисини девордан ошириб шеригига ташлаганда, милиция катта сержанти Э. Гаффоров томонидан қўлга туширилган. Ўғрилар шармандаларча бақириб-чақириб, атрофи-

га одамларни тўплаган. Йиғилганлар эса: «Қўйиб юбор, бешта туфли билан давлатнинг мулки камайиб қолардимиз», — дея ўғрининг ёнини олишди. Албатта кўпчилик ёрдам қўлини чўзганда эди, ўғри, дайди ва бошқа қонунбузарларнинг оёғи ўз-ўзидан тортилиб қоларди. Халқ — катта куч.

— Сиз дайдаларни тилга олдингиз. Нега улар кўпайиб қолди?

— Илгарилари бизда ишламай юрганларни жавобгарликка тортиш ҳақида қонун бор эди. Ҳозир эса бу қонуннинг бекор қилингани дайдаларнинг кўпайишига сабаб бўлмоқда. Бизга қамоқхоналардан кўнғироқ қилиб: «Фалон маҳбус 2-3 ойдан кейин озодликка чиқади. У Тошкентда ишлашни хоҳлар экан, уни тўқимачилар комбинати ёки бошқа бирор корхонага ишга жойлаштиринглар», — дейишади.

Биз югуриб-елиб ишга жойлаштирамиз, яшаш учун ётоқхона олиб берамиз, паспортини қайддан ўтказамиз, аммо у бир-икки ой ишламасдан жуфтани ростлайди. Ўзга шаҳарда бирор шубҳа билан қўлга тушса, мен фалон жойда ишлаётган, деб паспортини кўрсатади. Бош-

қа шаҳардан туриб тўқимачилар комбинатида ишлайдими ёки йўқми, аниқлагувча уч кун вақт кетади. Уни милицияда уч соатдан ортиқ ушлаб туриш мумкин эмас. Шунинг учун озодликка чиқаётган маҳбусларни туғилган жойига жўнатиш зарур. Паспорти эса маълум вақт ўтгунча милицияда турса, мақсадга мувофиқ иш бўлар эди.

— Ишларингиз мураккаблигини бир-икки оғиз гап билан батафсил билиб олиш қийин. Янги қабул қилинган қонунлар хизматни ўташга таъсирли ёрдам кўрсатаптими?

— Ўзгаришлар бўлди десаам хато қилмаган бўламан. Муҳими милициянинг ижтимоий ҳимояси ҳуқуқий мустақамланди. Олдинлари бирорта шубҳали кишини ушлаб, милицияга юринг деганимизда, у бормайман деб оёқ тираб олса, чорасиз қолар эдик. Энди эса бу тўғрида қонун пайдо бўлиб, ишминини енгиллаштирди. Илгари, корхона ва ташкилотларга бирор ходимини майда жиноят содир этиб, милицияга тушганлиги ҳақида хат ёзиб, унга чора кўрилишини сўрасак, жавобсиз қолиб кетаверарди. Бундан

буён корхона ва ташкилот раҳбарлари сукут сақлай олмайдилар.

Аммо техника тақчиллиги, рация йўқлиги ҳамон муаммолигича қолмоқда. Бу ишимизга анча панд бериб қўймоқда. Яқинда милиция капитани Ж. Қаландоров чайқовчилик билан шуғулланаётган кишини ушлаб, милиция пунктига олиб боради. Машина чақирини мақсадда кўнғироқ қилиш билан банд бўлганидан фойдаланган чайқовчи қочишга улгуради. Лекин милиция ходимининг ажирлиги, чаққонлиги туфайли у қайта қўлга олинади. Милиция ва чайқовчи орасидаги манзарани одамлар лоқайдик билан томоша қилишган. Ана сизга бизнинг совуққонлигимиз.

Ҳа, милиция майори Маҳкам Содиқовнинг куйинганича бор. Одамлар нечун лоқайд? Ўзлари ўғри ва жиноятчиларнинг кундан-кунга кўпайиб бораётганлиги ҳақида нолиб гапиришади-ю, зарур пайтда лоқайд томошабин бўлиб қолаверишади. Қачонки, ўғри ва жиноятчилар ўзига зарар етказгандагина, ёрдам сўраб милицияга мурожаат этишади. Унга эса бешта туфли билан давлатнинг мулки камайиб қолармиди, дея ўғрини милициядан ҳимоя қилишади. Нега шундай, нега одамлар оёққа турмайди?!

Шовқиддин САМИЕВ.
жамоатчи мухбир.

ЗУРАВОН БЕМОР

ЁКИ БИР ҲУҚМДАН КЕЙИНГИ МУЛОҲАЗАЛАР

Бу воқеа ўтган йил апрель ойида Тошкент тиббиёт олий билимгоҳининг 1-шифохонасида юз берганди.

Маъмур шифохона жарроҳлик бўлимининг мудирини Жамол Жамиллов бемор укаси билан хабар олиш мақсадида травматология бўлимига кирди. Кўраси, укаси алаҳсираб ётибди, иссиғи 40 даража! Аксига олиб, на навбатчи врач, на катта ҳамширани тополди. Табиий ҳол, аламини оппоқ халат кийиб олган, яқиндагина ишга келган қизалоқларга соча бошлади:

— Бу ер шифохонами ўзи ёки йўқми? Бемор иситмада ёниб ётса-ю, битта укол қиладиган одам топилмас! Қачон тартиб бўлади ўзи?!

Бу пайтда соат миллари 15 яримни кўрсатди.

Кутилмаган воқеа содир бўлди. Хоналардан бири эшиги зарб билан очилиб, аввал уч марта судланган бемор Равшан Рафиқов чиқиб келди.

— Намунча аюҳаннос соласан? «Тихий час»лигини билмайсанми?

— Мен жарроҳлик бўлимининг мудириман. Узингиз кимсиз? Бақирини мендан ҳам ошириб юбордингиз-ку, биродар.

— Наҳотки мени танимаган, «мудир»? Мен сенга «биродар» эмас, мана шу ернинг худосиман. Нимани хоҳласам шуни қиламан, тушундингми?

Шундай қилиб, икки киши — врач ва бемор ўртасидаги даҳанани жанг оқибати ёмон бўлди. Равшан Рафиқов шифокор Жамол Жамилловнинг бўйнига пичоқ қадади. Кейин вақтни бой бермай қочиб қолди.

«ТошМИДа дўхтирни сўйиб кетишибди». Бу совуқ мишмиш оғиздан-оғизга кўчди. Жиноятчини ушлашмоқда, қочиб юрганмиш, деган гап кўпчилики ваҳимага солиб қўйди. Саломатлик посбонлари эса: «Жиноятчини

милиция тутмагунча ишга чиқмаймиз», — деб тўполон кўтарган пайтлар бўлди. Хуллас, Собир Раҳимов тумани ИИБ ходимлари бир фурсат бўлса ҳам, ором деган нарсани буткул унутдилар, жиноятчи Равшан Рафиқовни қидириш кучайтирилди. Лекин, юқори идоралардаги мансабдор кишиларнинг кўнгироклари, ёмон ишляпислар, деган таҳдид солишлари ҳаммасидан ошиб тушди.

Нихоят 13 апрель куни жиноятчи Нукус кинотеатри орақасида бир улфати билан ичиб ўтирган пайтда ушланди-ю, гап-сўзларга ва қўнғирокларга бироз барҳам берилди.

ИИБнинг тергов гуруҳи ходими, милиция катта лейтенанти Дониёр Ҳасанов маълум фурсат ўтгач, жиноятчининг ҳақиқий башарасини очиб ташлашга муваффақ бўлди. Суд эса 1955 йилда турилган, муқаддам уч марта судланган тошкентлик Равшан Рафиқовни тўла айбдор, деб топди. У ЎзССЖ жиноят мажмуасининг 88-модда «Б» банди ҳамда 210-модда 3-қисми билан айбланиб, етти йилга озодликдан маҳрум этилди.

Индаллосини айтганда, адолат қарор топди. Жабрланувчи соғайиб кетди, жиноятчи жазосини олди. Эҳтимол, шу ўринда муҳтарам мухлисларимиз эътироз билдиришлари мумкин. Ҳақ жойида қарор топган бўлса бўлди-да, ўтган йилги воқеани ёзишдан, эски жароҳатни қайта тирнашдан мақсад нима, деган фикрга боришлари эҳтимолдан ҳоли эмас.

Бизнинг мақсадимиз, очиқ-ойдин айтсак бўлади, мазкур

жиноят борасида ўз қарашларимизни баён қилишдан, қиссадан ҳисса чиқаришдан иборат. Бизни биринчи навбатда ўйлантираётган нарса Равшан Рафиқовнинг тақдири. У жиноят содир этган бўлса-да, барибир инсон-ку! Кўр ҳассасини бир марта йўқотади, дейишади. Равшан «ҳассасини» бир эмас, уч марта йўқотган бўлса ҳам, нега маънавий сўқир кўзлари очилмади? Энди, тўртинчи марта тиканли сым билан қуршалган «зона»дан қутилиб чиққандан кейин ҳаётда тўғри йўл топиб олишига ким қафолат беради? Онадан фариштадек беғуноҳ, беозор туғилган инсоннинг раҳмшафқат деган олий ҳиссиётлардан буткул узоқлашиб кетишида, ваҳший жиноятчи қиёфасига киришида атрофдагиларнинг таъсири йўқ, деб ким айта олади?

Энди масаланинг иккинчи томонига ўтамиз. Сир эмас, фуқаролар орасида милиция ходимларини ёқтирмайдиганлар топилади, ҳатто андишасиз латифалари билан ички ишлар хизматчиларини пинҳона «кулги»га дучор қиладиганлар ҳам бор. Бирор кор-ҳол юз берса, ишониники, шундай тоифадаги кишилар биринчи бўлиб милицияга қора чаплашга ҳаракат қилишади. Мазкур жиноятни очиб жараёнида ҳам, таҳминимизча, шундай бўлди. Инсон саломатлиги посбонлари ва бошқалар милиция участка вакили Эшбадаловга «тош отдилар». Гўёки, у қўрқоқлик қилган, жиноятнинг олдини ололмаган. Юзакироқ қараганда, бу даъво ўринли-дай туюлади. Лекин чуқуროқ мулоҳаза юритилса-чи? Аввала шуни айтиш керак-

ки, участка вакили авлиё эмас.

Иккинчидан, Равшан Рафиқов шифохонага жойлашгандан кейин «худо» бўлиб эмас-у, лекин ҳеч нарсадан қайтмайдиган зуравон сифатида танилди. Беморлар ва тиббиёт ходимларини оғзига келган сўзлар билан ҳақоратлаш, ўзи айтганидек, «нимани хоҳласа, шуни қилиш» унинг учун одатий ҳол бўлиб қолди. Ҳатто Фурқат исмли врачни калтаклашгача бориб етди. Лекин унинг бу қилмишлари ҳақида милицияни юрак ютиб хабардор қиладиган бирорта мард топилмади. Агар шундай мард топилганда, врач Жамол Жамиллов жароҳатланмаган бўларди. Равшан Рафиқов эса сўнгги жиноятга элтувчи йўлдан қайтариларди. Бу фикрларни айнан назарда тутилаётган шифокорларга юзма-юз айтганимизча йўқ. Айтган тақдиримизда ҳам қандай жавоб олишимизни тасаввур қилса бўлади. Бундай ҳолларда одатда сизга жавобан: «Бу милициянинг иши. Ёмонга яқин йўлама, деган гап бор. Менга нима? Бир этак бола-чақам бор», — дейишади.

Лекин милиция ходимининг ҳам бола-чақаси борлигини, у ҳам ҳаётни севишини, яшашни исташини хаёлларига ҳам келтиришмайди.

— Касбимни яхши кўраман, — дейди бизга терговчи Дониёр Ҳасанов суҳбатимиз сўнггида. — Лекин бир нарса ёқмайди. Ушанда, Равшан Рафиқов қочиб юрган пайтларда бирортамизда тиним, хотиржамлик йўқ. Фикри-ёдимиз ўшанда. Ишқилиб жиноятчи бошқа бир бечорага зарар етказмасин-



да, дея ўз ёғимизга ўзимиз қовуриламиз. Шунақа пайтда юқоридан бўладиган қўнғироклар одамнинг меъдасига тегаркан...

Шу билан мақоламизга нуқта қўйсак бўларди. Лекин бир ҳикматни келтирмоқчимиз. Айтишларича қадим замонда бир ўғрини тутишибди. Подшо уни дорга осиб ўлдиршга фармон берибди.

— Улимнинг олдидан истанингни айт, — дейишибди.

— Сўнгги марта онамни бир эмиб қолай, — деб илтижо қилибди.

Унинг илтижосини бажо келтиришибди. Лекин ўғрини йигит она кўкрагини тишлаб узиб ташлабди.

— Мени эгри йўлдан қайтармаган Онанинг, ҳатто оқ сўт бериб вояга етказган бўлса ҳам, жазоси шу! — деб ҳаммани лол қолдирган экан. Қиссадан ҳисса деганларидек, мен ўша Онани жамиятга қиёслагим келади. Врач Жамол Жамилловнинг тан жароҳати олишида ва боя айтганимиздек, Равшан Рафиқовнинг тўртинчи марта қамоққа тушишида Она — жамият айбдор. Аввалги бепарволик ва кейинги қўрқув сабабчи.

Раҳмонали ҚОСИМОВ.

СУРАТДА: терговчи Д. Ҳасанов.

«НОТЎКИС» ВАГОНЛАР

ТЕМИР йўл мамлакатимиздаги турли sanoat туманларини боғлаб, халқ хўжалик юкларини ташийди. Бугунги тақчиллик транспортдаги ҳуқуқбузарликка ҳам таъсир кўрсатмоқда. Илгарилари sanoat моллари ўғрилган бўлса, ҳозирги кунда эгрлар назари асосан ун, қанд, ёғ, чой, газмол, кийим-кечак, аккумуляторларга қаратилган.

Айтиш жоизки, давлат мулкни ўғирлаш транспортдаги жиноятчиликнинг 70 фоизини ташкил этади. Вагон ва контейнерлар бир неча бор очилиб, юклар ўғирланади. Шунинг учун жиноят қидирув ходимлари жумҳуриятимизга кириб келадиган вагон ва контейнерларни чуқур текширишлари, аниқланган нуқсонларни қайд этишлари, лозим бўлса, жиноий иш қўзғатишлари керак.

Худди шу мақсадда Олмаота темир йўли билан боғлайдиган Чингелди бекатида тижорат текшириш пункти ташкил қилинган. Темир йўл вакиллари милиция ходимлари билан биргаликда иш олиб боришади. Ўтган йили бу бекатда 9727 та тижорат нуқсон аниқланди, 677 та вагонда эса ўғирлик содир этилгани туфайли қайтариб юборилди. Яна қанчалаб вагонларни текшириш имкони бўлмади, чунки уларнинг тўхташ вақти чегараланган.

Яқинда Шумилов бекатида томи тешилган контейнердан номаълум шахслар 37 минг сўмлик трикотаж маҳсулотларини, кейинроқ худди шу йўсинда 63 минг сўмлик кийим-кечакларни ўғир-

лашгани аниқланди. Вагон ва контейнерларнинг Чингелди бекатига «тўкис» келганлиги ходимларимизда шубҳа уйғотди. Улар Қозғистонга бориб, Туркистон ва Арис бекатлари оралигида чўлга яшириб қўйилган ўғирлик молларни топишга муваффақ бўлишди. Бу далиллар бўйича жиноий иш қўзғатилиб, Шарқий транспорт ички ишлар бошқармасига юборилди. Йил давомида 313 та жиноий иш турли транспорт ички ишлар бошқармасига жўнатилди.

Юқориди келтирилган мисоллардан ҳамма ўғирликлар Ўрта Осиё худудидан ташқарида содир бўлади, деган хулосани чиқармоқчи эмасман. Йўлларда халқ мулкига кўз олайтирган жиноий гуруҳлар ҳаракат қилмоқда. Ўтган йили содир этилган жиноятларнинг 48 фоизини уларнинг улушига тўғри келди. Транспорт ходимларининг ўзлари ҳам ўғирликдан четда қолмаптилар. Енгил пул топиш дардида ҳатто юкларни қўриқлаётган шахслар ҳам чалинишган. Ҳарбийлашган соқчилик ўқисини Хожиматов ўзи кўз қорачиғидек асраши керак бўлган автотехника ортилган юкни кузатиб бораётиб, «ГАЗ-24» автомашинасидан учта автомагнитофонни ўмарган. Ахир, ҳар бир вагон, ҳар бир юкка биз миллионҳо ходимини қўриқчиликка қўя олмаймиз. Шусиз ҳам улар зиммасига керак-нокерак ишлар қалаштириб ташланган.

Ҳар куни хизмат кўрсатиш жойларида милиция хо-

димлари иштирокида юзга яқин юклар тижорат кўригидан ўтказиб туширилади. Бу ишга жиноят қидирув оператив вакиллари, балоғатга етмаганлар билан ишлаш инспекторлари, оддий милиционерлар жалб этилади. Натижада муҳим оператив қидирув ишлари билан шуғулланиш ўрнига кун бўйи шу ерда миҳланиб қолишади. Ўтган йили ходимларимиз 34 мингта комиссия юк туширишда иштирок этдилар. Бу рақамлар тобора ўсиб бормоқда, чунки қўллаб вагон ва контейнерлар муҳрлари бузилган, ойна, эшиклар синган, қопқоқлари очилган ҳолда келмоқда.

Охириги икки йилда ўғирликлар 4,5 мартага кўпайгани жиддий ташвиш туғдирмоқда. Бу жиноятларни очиб учун эса вақт керак, ишлаш керак. Ҳозир ҳар бир ходимимизга меъеридан бир неча баробар кўп жиноий ишларни юритишга тўғри келади. Мана энди ишнинг сифати ҳақида ўзингиз хулоса чиқариб олаверинг.

Лекин шунга қарамай биз қўлимиздан келганича ҳар бир жиноятни тўлиқ, чуқур текшириб, ниҳоятсига етказишга ҳаракат қиламиз. Токи ҳар бир қонунбузар қилмишига яраша жазосини олсин.

О. ОТАЖОНОВ,
Ўрта Осиё транспорт ички ишлар бошқармаси жиноят қидирув бўлимининг бошлиғи.

Муҳаррир
З. ОТАЕВ



БАҒДОД туман ички ишлар бўлими участка инспектори милиция лейтенанти Фазлиддин Матбобоев ўз участкасида доимо тартиб-интизом бўлиши учун курашади.

Маълумки, шу кунларда халқ истеъмоли моллари етарли эмас. Айрим савдо ходимлари эса борларини ҳам пештахталар остига яширишмоқда. Фазлиддин участкасида ана шундай воқеалар бўлмаслиги учун савдо дўконларида тез-тез бўлиб туради.

СУРАТДА: участка инспектори милиция лейтенанти Ф. Матбобоев озиқ-овқат дўкони сотувчиси Қумринисо Қўзиева билан маҳсулотларни кўздан кечиришмоқда. Ғуломжон УБАЙДУЛЛАЕВ олган сурат.

ОИНАДАН УПКЛАМА

ҲАДДИДАН ОШГАН ПОСБОН

23 январь куни Тошкентдаги «Чорсу» меҳмонхонасига тунги бошпана топиш илнинида келганлар кеч соат саккизларда бир неча дақиқани юрак ҳовучлаб ўтказишди. Ахир, қулоғинг тағида тўппончадан қарсиллатиб ўқ отиб туришса, чўчимай бўладими?

Зудлик билан етиб келган милиция наряди шифтга қарата ўқ узган кишини ушлаганда, унинг фирт маст эканлиги

аниқланди. Энг ажабланирлиси Октябрь туман ИИБда юз берди. Қуролли безори Наманган туман ИИБ жиноят қидирув бўлимига бошлиғи милиция майори Абдурахмон Инъомов экан. Нохизмат вақтида «мерганлик» қобилиятини нечун шундай тарзда намоиш этганини ҳозир олиб борилаётган текшириш аниқлайди. Унинг натижаларини кейинроқ хабар қиламиз. **Ғ. БОЛТАБОВ.**

МАНЗИЛГОҲИМИЗ: 700029, Тошкент, Лопатин кўчаси, 1.

Ўзбекистон Компартияси Марказий Қўмитаси нашриётининг Меҳнат Қизил Байроқ орденли босмахонаси. 700083, Тошкент, Ленинград кўчаси, 32.

Рўзнома офсет усулида, А-3 қолипда босилган.

Зак. 4748.

Телефонлар: Муҳаррир — 32-38-86, муҳаррир ўринбосарлари — 39-77-23, маълумотлар учун — 39-70-40.

1 2 3 4 5 6 7 8 9 10 11 12.

«ПОСТДА» —
(«НА ПОСТУ»)
Орган коллегия МВД
ЎзССР

Индекс: 64615.